

通鑑論

一
函
八
冊
函

進稽古錄表

臣光言竊以九州四海一日萬幾將察知民物之性情蓋布在文武之方策雖历年多而舉其大要則用力少而見夫全功恭以

皇帝陛下富有春秋敕寧方夏念終始典於學於緝熙單厥心延登老成親近觀講發論語章句探經藝之同歸誦寶訓丁寧憲

祖宗之不易有本如是實惟濫觴惟稽古堯舜之舊章惟

信史春秋之成法高山可仰覆轍在前其興亡在知
人其成敗在立政或當艱難之運而不能師用賢智
或有惻隱之意而無以照知忠邪載籍之編患乎太
漫鑒觀之主力不暇遑敢用芟夷略存體要由三晉
開國迄于顯德之末造臣既具之于厯年圖自六合
爲宋接乎熙寧之始元臣又著之于百官表乃若威
烈丁丑而上伏羲書契以來對越神人可用龜鏡悉
從論纂皆有憑依總而成書名爲稽古錄二十卷因

仍書局繕寫奏篇茲冒昧以上陳助聰明之遠覽臣
光中謝恭惟

太皇太后陛下定九鼎以守天下之重器乘六龍以御古
今之正權思齊之功啓佑聖學過物之濟燕及

宗祧至於法弊於涼而改爲官非其人而變置御戎之策
上下措國之勢安危據舊以鑒新去彼而取此陶成
萬化簡在

兩宮七廟乘無疆之休微臣與不朽之業干冒

宸扆無任

正議大夫守尚書左僕射兼門下侍郎上柱國河內
郡開國公食邑四千一百戶食實封一千五百戶臣
司馬光上進

稽古錄論

周論

周自平王東遷日已衰微至於戰國又分而爲二其土地人民不足以比強國之大夫然而天下猶尊而事之以爲共主守文武之宗祧綿綿焉久而不絕其故何哉植本固而發源深也昔周之興也禮以爲本仁以爲源自后稷已來至於文武成康其講禮也備矣其施仁也深矣民習於耳目浹於骨髓雖後世微弱其民將有陵

慢之志則畏先王之禮而不敢爲將有離散之心則思先王之仁而不忍去此其所以享國長久之道也不然以區區數邑處於七暴國之間一日不可存况數百年乎

韓論

韓以微弱之國居天下之衝首尾腹背莫不受敵然猶社稷血食幾二百年豈非昭侯奉法之謹賞不加無功罰不失有罪後世雖不肖猶得蒙遺烈以自存乎嗚呼

有國者安可以無法哉

魏論

魏文侯以列國大夫好賢禮士終爲天下之顯諸侯至
于今稱之惠王有一商鞅不能用而棄之於秦使還爲
國害喪地七百里竄身大梁子孫遂微賢不肖之相望
豈不遠哉無忌去而魏輕還而魏重安僖王猶以爲疑
無忌死而魏亡賢者之於國家何如哉

楚論

楚自祝融鬻熊以來其有國幾何年矣方其盛也奄有
南海憑陵諸夏及懷王放廢忠良親近讒慝惑張儀之
口而耳目不能自守見欺而不悟亡師而不悔以失濟
失客死於秦使其子孫銜涕忍耻以事仇讎強之女而
不敢辭陵廟焚而不敢怨兔逃鼠仗自屏於陳東兵不
戰而攻之不解割地請和而侵之不止卒不見赦而國
以淪亡不亦悲乎

燕論

燕在春秋時玉帛不通於中國簡策所書鮮焉及文侯
始大與諸侯約從以擯秦王噲慕堯舜以國授子之而
敗死爲天下笑求名失實乃至是乎昭王刻意勤身招
賢下士卒用弱燕以報強齊有志者功無不成也惠王
信讒以喪垂成之業惜哉燕丹不勝一朝之忿以犯虎
狼之秦輕慮淺謀挑怨速禍使召公之廟不祀忽諸罪
孰大焉而論者或謂之賢豈不過哉夫爲國家者任官
以才立政以禮懷民以仁交鄰以信是以官得其人政

得其節百姓懷其德四鄰親其義夫如是則國家安如
磐石熾如火火火觸之者碎犯之者焦雖有強暴之國尙
何足畏哉丹釋此不爲顧以萬乘之國決匹夫之怒逞
盜賊之謀功隳身修社稷爲墟不亦悲哉夫其膝行蒲
伏非恭也復言重諾非信也糜金散玉非惠也刎頸決
腹非勇也要之謀不遠而動不義其楚白公勝之流乎
荆軻懷其豢養之私不顧七族欲以尺八匕首強燕而
弱秦不亦愚乎

趙論

武靈王不顧流俗變胡服習騎射以制林胡滅中山大
啟土宇威加強秦可謂賢君矣及溺於嬖寵欲分國以
王二子卒餒死沙丘宮佚欲爲之敗也如此夫趙於三
晉爲最強及貪上黨之田以喪長平之師用郭開之讒
而棄廉頗李牧使宗廟不血食言之可爲長歎矣

齊論

齊地廣而民衆負滄海以臨中夏重以威宣之賢國家

富強及湣王驕汰不可盈厭自取顛沛苟無田單齊不
國矣凡游六言從橫者雖更相傾覆要之合從者六國
之利也齊爲三晉燕楚之根柢三晉燕楚爲齊之藩蔽
秦雖強暴百有餘年不能一諸侯者以其表裏相鈎帶
也及齊王建用后勝之謀信秦閒之言拱手以事秦不
救五國五國已亡而齊并爲虜理勢然也

秦論

孔子曰知及之仁不能守之雖得之必失之秦之謂矣

善夫賈生之言曰秦以區區之地千乘之權招八州而
朝同列百有餘年然後以六合爲家穀函爲宮一夫作
難而七廟墮身死人手爲天下笑者何也仁義不施而
攻守之勢異也

項羽論

世稱項王不王秦而歸楚故失天下觀其擁百萬之衆
西入函谷擅天下之勢裂山河以王諸侯自謂可以逞
其私心而人莫敢違安行無禮忍爲不義欲以一夫之

力服億兆之心才高者見疑功大者被絀推此道以行之雖得百秦之地將能免於敗亡乎

西漢論

高祖奮布衣提三尺劍八年而成帝業其收功之速如是何哉惟其知人善任使而已故高祖自謂鎮國家撫百姓不如蕭何運籌策決成敗不如子房戰必勝功必取不如韓信三者皆人傑吾能用之所以取天下韓信亦曰陛下不善將兵而善將將斯言盡之矣呂氏之亂

漢氏不絕如綫然而卒不能爲患者外有宗藩之強內
有絳灌之忠也文景之時天下家給人足幾致刑措後
世皆知稱慕莫能及之夫民之情何嘗不欲安樂而富
壽哉文景能勿擾而已矣孝武喜淫侈慕神僊宮室無
度巡游不息窮兵於四夷嚴刑而重賦迹其行事視秦
皇何遠哉止以崇儒重道求賢納諫故其成敗若此之
殊也孝昭以童稚之年辯霍光之忠確然不可動何天
資之明也然光猶專政而不歸此則光之罪矣孝宣綜

覈名實信賞必罰使吏稱其職民安其業方之孝武功
烈優焉孝元優游不斷漢業始衰孝成荒於酒色委政
外家孝哀狠愎不明嬖幸盈朝陵夷至於孝平以幼冲
嗣位王莽因之遂移漢祚莽恃其詐慝煩民玩兵罪盈
怨積而天下叛之矣

東漢論

新室之末民心思漢如渴之望飲饑之待餽也是以諸
劉奮臂一呼而遠近響應曾未期年元惡授首更始入